

УзССР Давлат китоб нашратаси

Мустақилликка бағишлов

Ҳос. кўрсаткичи пайванди УзССР

Киндик қоним тўкилган тупроқ

Ватан... Унинг тупроғида минглаб баҳор гуллаган, минглаб куз хазонлари кўмилган. Беҳудуд коинот қаърида бетин учиб бораётган мана шу она сайёрани Оллоҳ бизга, инсонга инъом этган. Баъзан, тунлар кўк тўла юлдузларга боқиб бутун борлигим ҳайратга айланади. Юрак эса қафасини синдиргудек типирчилайди, тутқун қушдек нола чекади. Ва, хаёлимда бир савол ҳоким ўрнашади:

Ватан нимадир? Балки Ватан нелигини англаганларгина уни билишга қодирдир. Мен эса...

Сўқмоқ йўлдан қишлоққа кириб боряпман. Қуёш уфқда қизаради. Тупроқ тафти кўтарилиб кўнгилни хуш ис билан тўлдиради.

Ҳар бир инсон қалбига киндик қони тўкилган тупроққа соғинч ва тупроқни севиш туйғуси сингдирилган.

Қишлоғимнинг қуйи қисми пастқам тепаликлардан, қиру адирлардан бошланган бўлса, боши мағрур чўққиларга туташиб кетган. Қуёшдан нур талашган жилгаларнинг олтин жилваси кўнгилга сурур бахш этади. Юракдан шоирнинг:

“Бу дуненинг жаннати тоғлар,
Мени чорлар бағрига бот-бот.
Кучоғида кезганим чоғлар,
Замзамадай суюмли ҳаёт”.

деган сатрлари отилиб чиқади. Алвон қизғалдоқларнинг сеҳри кўнгилни тинимсиз жунжитади. Асрий кўк либос кийган арчалар армонларни аритади. Югирик алқорлар тошдан тошга сақраб нигоҳингизни қувнатади. Ҳатто, бўрилар ҳам бу ер одамларига, чорваларига тегишмайди. Ризқини узоқлардан ўз боласига келтиради. Ваҳший ҳайвон қонида ҳам ўз ватанига меҳр туйғуси яширинган...

Овозимни баралла қўйиб, шу — Ватан дейман.



Обуна — 95

Азиз болалар!

1995 йилдан сизнинг сеvimли газетангиз “Тонг юлдузи” учун муҳарририят ходимлари “теша тегмаган”, қизиқарли, одоб-ахлоққа чақирувчи талайгина мақолаларни тайёрлашмоқда. Бунда сиз: ота-онасининг эътиборсизлиги билан чиқиб кетган ёнғиндан ҳеч иккиланмай тўрт нафар укасини қутқариб олган 14 ешли довиорак бола ҳақида, 13 ёшида инсонларда учрайдиган касалликни даволаш бўйича мураккаб тажрибалар ўтказаётган истеъдодли ўқувчи ҳақида, ота-онасининг зўрлиги билан хорижга кўчиб кетган боланинг қийинчиликлари ҳақидаги мақолаларни ўқийсиз.

Агар сизни ушбу мавзулар қизиқтирса ва сиз ўз қадрдон газетангиздан ажралиб қолишни истамасангиз, унда албатта, “Тонг юлдузи” газетасига 1995 йил учун обуна бўлинг.

Обуна баҳоси:

1 йилга — 54 сўм.

6 ойга — 27 сўм.

3 ойга — 13 сўм 50 тийин.

Нашр кўрсаткичи: 64563

Дилдаги гоплар



— Ким нима деса, десину, аммо “Тонг юлдузи”дан қизиқроқ газета йўқ. Ишонмасангиз ўзингиз олиб ўқинг. У бизу сиз каби болалар ҳаётиндан ёзади, дунёдаги барча янгиликлардан огоҳ этади. Агар шу йилга қадар бу газетата обуна бўлмаган, уни ўқимаган бўлсангиз, шошилинг, албатта 1995 йил учун обуна бўлинг. Афсусланмайсиз.



Соғлом авлод учун

Мастура опадан болалар чўчишмайди

Халқимизда ҳўб топиб айтилган бир нақл бор: “Фарзанд — болдан лазиз”. Фарзандларимиз соғлом, баркамол ва етук бўлсалар, нур устига нур.

Республикамизда “Соғлом авлод учун” жамғармасининг ташкил қилиниши, “Болани она сўти билан боқиб” йилининг жорий этилиши ва шу каби қатор тадбирларнинг ўтказишдан асосий ҳам мақсад шу — фарзандларимизни соғлом ва баркамол вояга етказиш эди.

Мустақиллигимизнинг уч йиллиги муносабати билан республикамизда ана шу мақсад йўлида хизмат қилиб, қатор орден ва медаллари билан мукофотланганлар орасида фарзандларимиз таълим-тарбияси,

саломатлиги йўлида фидокорона меҳнат қилиб келаётган инсонларнинг ҳам борлиги авлодимиз келажакига бўлган ғамхўрлигининг яна бир яққол намунасидир.

Тошкент шаҳри, Собир Раҳимов туманидаги 21-болалар шифохонаси бош шифокори Мастура опа Зокирова ҳам кўп йиллик меҳнатлари эвазига шарафли “Шўхрат” медали билан тақдирландилар.

— Менга берилган ушбу мукофотни, авваламбор уруш сабаб дилидаги орузлари тўла ушалмай қолган отажонимга, кўп йиллардан буён тиббий ҳамшира бўлиб меҳнат қилиб келаётган онажонимга берилган деб ҳисоблайман, — дейди Мастура опа Зокирова, — Зеро, менинг

шифокор бўлиб етишиб, халқимга озми-кўпми меҳнатим сингаётгани ана шу инсонларнинг таълим-тарбияси, панду насиҳатлари самараси деб биламан. Қолаверса, шифохонамизда кўп йиллардан буён фарзандларимиз саломатлигига посбон бўлиб келаётган устозларимнинг мукофоти деб биламан.

Сир эмаски, ҳозирги иқтисодий тақчиллик даврида ўз касбини ўзгартириб кетаётган шифокорлар ҳам йўқ эмас. Бизнинг аҳил жамоамиз қатори ҳаммаша тўлиқ. 55 нафар шифокорларимизнинг аксарияти 20-30 йиллардан буён ўз касбини ардоқлаб келаётганлардан. Уларнинг кўп йиллик тажрибалари биз ёш шифокорлар учун тажриба мактабини

ўтайди. Ана шундай кекса ва тажрибали шифокорларимиздан бири Раъно опа Ҳамдамова жамоамизнинг фахридир. Мустақиллигимизнинг бир йиллиги муносабати билан Раъно опанинг 33 йиллик фидокорона меҳнатлари муносиб тақдирланди, “Соғлом авлод учун” ордени совриндор бўлди. Фарзандларимизни нозик навниҳолга қиёслаш мумкин. Улар турли касалликларга тез чалинадилар. Об-ҳаво ўзгариши билан улар орасида шамоллаш касаллиги кўпаяди. Биз шифокорлар эса ҳадеб дори-дармонларга мурожаат этавермай, уларни миллий табобат усуллари билан даволашмиз лозим. Ҳозирги пайтда укол қилишни ўрганиб олиб, фарзандлари, таниш-билишларига ўзлари укол қилаётган хонаки ҳамширалар кўпайиб бормоқда. Ваҳоланки, ана шундай ҳамширалар аввал ўзлари тиббий кўриқдан

ўтишлари лозим. Улар бизга мурожаат қилсалар, тиббий кўриқдан ўтганликлари ҳақида махсус гувоҳномалар берсак, баҳамжихат иш юритсак, мақсадга мувофиқ бўларди.

Қилинажак ишларимиз жуда кўп, режаларимиз улкан...

Одатда жажжи болажонлар оқ халат кийган шифокорлардан ҳайқишади. Бунга балки, болаларимизга қарата “ана доктор опанг келаяпти, айтганимни қилмасанг, ҳозир сенга игна санчиб кўяди”, дея пўпнса қилишимиздандир. Лекин Мастура опадан болалар чўчишмайди, уни худди ўз оналаридек севишади. Мастура опа нурафшон чеҳраси, майини табассуми, ширинсуҳанлиги, болалар қалбига йўл топа олиши ва ўта самимийлиги сабаб, каттаю кичик ардоғига тушган шифокорлардан.

Феруза ЖАЛИЛОВА.

"Ором" да
боғча-мактаб

Тошкентдаги "Ором" болалар боғчасида пойтахтимизда биринчи бўлиб боғча-мактаб очилди. Янги бино қурилиб, 21 нафар иқтидорли кичикинтойлар боғча бағридаги мактабда таҳсил ола бошладилар. Боғча жамоасининг ташаббуси билан ташкил қилинган ушбу боғча-мактаб бошлангич таълимга асосланган бўлиб, унда ўқувчиларнинг қўшимча равишда эстетика, этика, чет тиллари ва бошқа фанлардан сабоқ олишлари кўзда тутилмоқд.

Ўқувчиларнинг пухта билим олишлари учун барча шарт-шароитлар яратилган, еруғ ва шинам синф хоналари, бадий асарларга бой бўлган кутубхона ҳозирлаб қўйилган.

Ўз мухбиримиз.

"Нимжон бола"

Утган йили мени синфдошларим шундай чақирдишарди. Сабаби, бўйимнинг пастлиги ва тез-тез шамоллаб қолаверишимдан эди.

Бу йил мактабимизда теннис тўғарагининг ташкил қилинганлигини эшитиб, севиниб кетдим. Зафар исмли дўстим билан тўғаракка аъзо бўлдик. Ҳозирда ҳафтага 5 кун мунтазам тўғарак машғулотларига қатнаб турибмиз. Тўғарак раҳбаримиз Қодир ака Шералиевнинг айтишича, мен спортнинг бу турини жуда тез ўзлаштириб олган эмишман. Узаро мусобақаларда ҳам тенгдошларимдан бўш келаётганим йўқ. Ўзимни жуда дадил, кўп ишларга қодирдек ҳис қиламан. Қисқаси, спорт билан дўстлашишда ҳикмат кўп экан!

Ҳикматилла ЯҲЁЕВ,
Тошкент шаҳри.



Болалиқни қўмсаб

Собир Раҳимов туманидаги 22-мактабни кўпчилик яхши билади. Чунки республикамизнинг кўплаб таниқли ёзувчи ва адиблари, эл севган фарзандлари айнан шу билим даргоҳида камол топганлар. Янги ўқув йилида ҳам мактабнинг файзи бўлакча, 60-бор ўз битирувчи қалдирғочларини мустақил ҳаётга учирма қилиш тарадудиди.

60 йил! Бу оз фурсат эмас, албатта. Бу

Қадрдон
гўша

давр мобайнида қанчадан-қанча шоиру ёзувчилар, олиму фузалолар етишиб чиқди: Қуддус Муҳаммадий, Туроб Тула, Пулат Мўмин, Эркин Воҳидов, Анвар Исроилов, Мақсуд Қориев, Қудрат Ҳикмат, Қутби Носирова, Муқаддас Абдусаматова... эҳ-ҳе, уларнинг сафи жуда кенг. Биринчи ўзбек генераллари Собир Раҳимов ва Собиржон Охунжонов ҳам айнан мана шу мактаб парталарида илк бор "Алифбе" варақлашган.

Ушбу масканда собиқ битирувчилар билан мактаб ўқувчиларининг тез-тез учрашувлар ўтказиб турилиши яхши бир анъанага айланган. Яқинда мактабнинг 1953-54 йиллардаги битирувчилари қадрдон гўшалари, сеvimли устозларини зиёрат қилгани жамланишиди. Физика-математика фанлари доктори Қудратилла ака Латипов ва биология фанлари доктори Абдулла ака Қориевни ўқувчилар саволларга қўмиб ташлашди. Ўз навбатида, улғайгач улар сингари ҳақиқий инсонлар бўлиб етишишга, "22-мактаб битирувчилари"нинг фахри рўйхатини тўлдирар боришга тантанали ваъда бердилар.

Суратларда: дўстона учрашувлардан лавҳалар.

Р. АЛЪБЕКОВ суратта туширган.

Ўз уйи ойнасига тош отаётган болаларни кўрмаганмиз. Лекин, кейинги пайтда ўзи таълим олаётган мактаб эки йўловчи поезди деразаларини чилпарчин қилаётган болакайлари бахтга қарши, жуда кўп учратяймиз. Хар гал Андижонга борганимда Кўқон ва Қува оралигидан йўловчиларнинг жон ховучлаб ўтишларига гувоҳ бўламан. Чунки айнан шу жойда поездга "ҳамла" бошланади. Гапимга шубҳа қилсангиз, 635-рақамли Тошкент-Андижон поездига чиқиб кўринг — ойналари синмаган бирор вагонни топа олармикансиз?..

Қизиги шундаки, бу худуддан поезд анча ноқулай вақтда — Андижонга боришда тонг соат 4 билан 5, Тошкентга қайтишда эса окшом соат 8 билан 9 оралигида ўтади. Шундай

бемаҳалда йигитчаларнинг кўчада юрганлигидан ҳайратланасан, киши. Нима, атайлаб ойна синдириш ниятида йўлга чиқишармикан? Болакайлارга бундан қандай наф бўлиши мумкин? Наҳотки, бу бебошликка чек қўйиш, кўча безориларнинг "тизгинини тортиб" қўйиш шунчалик қийин бўлса?!

Шунингдек, Тошкент — Китоб поездининг айрим вагонларида ҳам соз ойна кам. Нега энди, шунча йилдан буён шикаст етмай — элнинг кунига яраб келаётган вагонлар ҳозирга келиб бундай аҳволга тушиб қолди? Ахир бундай манзараларни биз илгари айрим иссиқ мамлакатларнинг кинофильмларидагина кўрар эдик. Нега баъзи фарзандларимиз шу қадар тубанлашиб кетди?

Пишиқчилик пайтларида гилос эки узумимизни ола қанот ҳаққалардан кўриқлаш учун астойдил овора бўламиз-у, болалар боғчасининг ҳовлисидаги нимжон кўчатларни эки мактаб стадионидаги чимзорни кимларнингдир кўй, сигирлари пайҳон қилаётганини кўрсак жонимиз ачишмайди Нега?

Бугун мактабларда ўйилмаган эки турли сўзлар ёзилмаган партани топиш амри маҳол бўлиб қолди. Нега?

Шу йил баҳорда Тошкентдаги Нуриддин Носиров номли ихтисослашган лицей-мактабга бордик. Ўша куни ўтган тадбирдан қанчалар масрур бўлганимни айтмай қўя қолай, сабаби мени бундан ҳам лол қолдиргани бошқа манзара бўлди: бу мактабда бирорта гулсиз синф эки гулсиз йўлакни кўрмадим. Дарвоқе, гул ўстириш учун унчалик кўп вақт ҳам, меҳнат ҳам, маблағ ҳам керакмас. Болалар кўнглидаги табиатга муҳаббат туйғусини рағбатлантириб озгина ҳафсала қилинса бас — ҳаммаёқ яшнаб кетади. Бизни қувонтирган яна бир чиройли манзара шў бўлдики, тўрт қаватли мухташам мактабнинг ярқиратиб артилган деразалари орасида бирорта ҳам синиқ ойнага кўзимиз тушмади. Демак, бу даргоҳда таълим олаётган ўғил-қизларнинг мактабларини ўз уйларидак авайлашлари шубҳасиз. Эҳтимол, муаллимларини ҳам ота-оналари каби эъозлашар.

Қизик, бутун ойналарни кўриб ҳайратлансак, дераза раҳларидаги яшноқ гулларни, пайҳон қилинмаган

боғларни кўриб ҳаяжонлансак, демак, бу каби оддий ҳоллар "ноёб"лик мақомига кўтарилибди-да!

Ёдимда, ўқувчилик чоғларимизда бир бебош тенгдошимизга қайсидир гуноҳи учун муаллимимиз ўшқириб икки тарсаки туширганди, синфдош қизларимиздан бири беихтиёр "урманг", деб йиғлаб юборганди.

Ўшанда ўзимизни ҳам танаффусларда холи-жонимизга қўймай безор қилиб юрадиган "иккичи" синфдошимизга қўл кўтарган ўқитувчимизнинг ҳаракати ҳеч биримизга еқмай, ҳаммамизнинг кайфиятимиз бузилган эди. Бизни

ТОШ

УШЛАГАН
БОЛАЛАР

норози қиёфада кўрган домлаemiz дарров овозини пасайтириб, дарсини давом эттирганди ўшанда. Шу-шу биз бу кичининг болаларга қўл кўтарганини кўрмадик. Назаримда, ўша куни ўзимиз ҳам сезмаган ҳолда мувозанатдан чиққан бир одамни шаштидан қайтаришнинг жуда осон йўлини топган эдик.

Кексалар, ҳар қандай бемаънилик бекорчиликдан дейишади. Ростдан ҳам, биз, ота-оналар нафақат фарзандларимизда жавобгарлик, масъулият туйғуларини уйғота олмаямиз, балки оларни каровсиз қолдириб, айрим ҳолларда унутиб ҳам қўяймиз чоғи..

Албатта, болалардан арашлаш ўринли эмас, лекин ота-оналардан гина қилишга ҳаққимиз бор, деб ўйлайман. Негаки, падали бузруков, волидаи муҳтарама деб эъозланувчи бу улуг зотлар фарзанд учун ҳомийгина эмас, устоз ҳамдир. Ахир, ўзимиз ҳам китоб ўқишни, газета-журнал варақлашни аямиздан, дадамиздан ўрганганмиз. Улар бизни "ўқигин", деб қистамаган, балки ўзлари ўқиб ибрат кўрсатган, Нима, бизнинг фарзандларимизга ҳар томонлама ўрнак бўлишга қунтимиз, кўрбимиз етмайдики? Етади! Бунга бироз ҳафсала керак, холос.

Биз баъзан болаларга насиҳат еқмайди, деб қўя қоламиз. Аслида бу гапга унчалик бўшилиб бўлмайди, ота-оналари билан суҳбатлашишни, уларга тақлид қилишни кичикинтойлар жуда яхши кўради. Ҳолбуки, улар билан гурунглашиб, ўзимиз ҳам бир дунё завқ оламиз. Фақат шунга вақт ажрата олсак, бас!

Ҳар бир ота-она фарзандлари олдида ўзини бурчлигини эмас, қарадордек ҳам сезса, улар ҳади қилаётган қувончлар эвазига мен болаларимга нима беряпман, деган саволга жавоб қидирса, бизни қўйнаётган жумбоқлар бирин-кетин ечилиб кетармиди, деган фикрдимиз. Зотан, бугун вагон эки мактаб деразасини мўлжалга олаётган болакай эртага қўшинисини эки оғайнисини нишонга олмаслигига ҳеч ким қаролат бера олмайди.

Фарзандларимизнинг дийдаси қотиб кетмаслиги учун уларнинг қўлидаги тошларни олиб, тезроқ гул тутқазайлик, токи болаларимиз яхшилик ва емонликнинг фарқини барвақтроқ англасин. Юрт туйғусини сезсин, кутлуг тантаналарда биз билан енма-ен қатнашибгина қолмасдан, Ватан, хурлик, истиқлол қаби муборак сўзларнинг асл маънисини дил-дилдан ҳис қилсин.

Замира ЭГАМБЕРДИЕВА.



Ўйин-викторина

"СВЕТАФОР-94"

Болалар! Газетамизнинг шу йил 29 март сонидида "Светафор-94" ўйин-викторинасининг I босқич савол ва топшириқларини эълон қилган эдик. Бу саволларга 50 дан зиёд жавоб олдик. Бу, албатта, оз ва айрим вилоятларда болаларга йўлларда ҳаракатланиш қондаларини ўргатиш яхши йўлга қўйилмаганлигидан далолат беради. Ўйин-викторинамизнинг навбатдаги босқичида қатнашувчи ўқувчилар сони янада ортади деган умиддамиз.

Мактублар орасида биргина ўқувчи эмас, балки "Светафор" эки "Ҳаракатнинг еш назоратчилари" гуруҳлари аъзоларининг биргалиқда юборган жавобларнинг борлиги бизни қувонтирди. Бундай гуруҳ аъзолари "Светафор" ўйин-викторинасини газета орқали кузатиб боришлари, унинг савол-топшириқларига жавобларни қизиқиш билан топишларини ҳам бизга маълум қилишган. Наманган вилояти, Наманган туманидаги 14-мактабнинг 7-синф "Ҳаракатнинг еш назоратчилари" гуруҳи аъзолари;

Тошкент вилояти, Чирчиқ шаҳридаги 2-лицей мактабнинг "Светафор" гуруҳи ана шулар жумласидандир.

"Светафор-94" ўйин-викторинаси ҳақамлари ушбу икки гуруҳни ва Наманган вилояти, Чортоқ туманидаги 28-мактаб ўқувчиси Зайнаб ҚИРГИЗОВАни ўйин-викторинанинг I босқич ғолиблари, деб топди. Биз уларни қутлаймиз ва кейинги босқичларда ҳам улардан жавоб мактублари кутамиз.

Энди эса I босқичда эълон қилинган саволларнинг жавоблари билан танишгин.

I. Аҳмад тўғри иш қилмади. Чунки 12 ёшли болалар катта велосипедни серкатиов йўлда ҳайдашлари асло мумкин эмас. Уларга ўз велосипедларини фақат махсус ажратилган жойлардагина ҳайдашларига рухсат этилади.

(Давоми 3-бетда).

Халқ амалий санъати

ХОРИЖЛИКЛАР
ҲАЙРАТДА ҚОЛДИ

Каттақўрғон шаҳри, Ойбек номидаги Болалар ва Ўсмирлар ижодий уйи қошида ташкил этилган нафис ва қадимий халқ санъати — зардўзликни ўргатувчи курс талабалари ҳам ана шулардан. Курснинг ташкил этилганига ҳали кўп бўлмаган бўлса-да, тўғарак аъзоларининг сони кундан-кунга ортиб бормоқда. Уларга бу санъат сирларини устозлари, тажрибали зардўз Нигора опа Пирназарова

ўргатмоқда.

Ҳозирги кунда тўғарак аъзолари аҳолидан буюртмалар олиб ишлашмоқда, буюртмалардан тушган маблағнинг бир қисми Ойбек номли Болалар ва Ўсмирлар уйи ҳисобига туширилмоқда, яна бир қисми эса тўғаракка турли жиҳозлар ва зардўзлик дастохларини яратишга сарфланмоқда. Тўғарак аъзолари тиккан зардўзи буюмларнинг кўрғазмасини кўздан кечирар эканман, каттақўрғонлик зардўзларнинг нафис ва тақрорланмас яратувчанлик ишларида зафарлар тиладим.

Козимжон СОАТОВ,
Самарқанд вилояти, Каттақўрғон шаҳри.


Чайнворд

Болалар! Бу йил улуг Шайхзоданинг "Мирзо аллома, олим Мирзо Улугбекнинг 600 йиллик юбилей республикамизда кенг нишонланмоқда. Сизлар ҳам ушбу табаррук зотнинг ҳаёти ва ижоди борасидаги кўпгина маълумотлар билан танишсиз. Шу сабаб Мирзо Улугбек ҳақидаги билимларингизни синая кўриши мақсадида эътиборингизга ушбу чайнвордни ҳавола қилмоқдамиз. Ўзингизни синая кўринг.

1. Буюк Темури хукмронлигида қурилиши бошланиб, Мирзо Улугбек даврида битказилган масжид. 2. Фалакиёт фани билан шуғулланувчи олим. 3. М. Шайхзоданинг "Мирзо Улугбек" сахна асаридаги қаҳрамон.

4. Улугбекнинг ҳарб юришларида хотира дафтари тутиб воқеаларни ёзиб борувчи котиби, Гиёсиддин... 5. Меъморий ёдгорлик ансамбли. 6. Улугбекнинг ўғли. 7. Сайёра. 8. Муҳаммад болалигида китобини мутолаа қилган юнон олими. 9. Улугбек тўплаган билимларини ифодаловчи тиб илмига доир рисоласи. 10. Радиуси 40,2 метрди улкан кузатиш асбоби. 11. Турт ёшдан бошлаб Муҳаммаднинг тарбияси билан шуғулланган буви. 12. Халқаро Кенглама станцияси қурилган жой номи.

Тузувчи: Анвар МИРЗАЗОДА.



Ҳасан Олимов Самарқанд вилояти Болалар ва ўсмирлар ижодиёти саройи, "Наққошлик" тўғараги раҳбари Санобар опа Аннаеванинг умидли шогирдларидан. Ҳасанжон шаҳардаги 56-мактабнинг 9-синфида аъло баҳоларга ўқиш билан бирга мана, уч йилдири ана шу тўғаракка ҳам мунтазам қатнашиб келмоқда.

Дастлаб бироз қийинчиликлар ҳам бўлди, ишлаган наққошларидан кўнгли тўлмай юрган кезларда, "Мендан наққош чиқмас экан-да" деган ҳаёлларга борди. Шундай пайтларда устозининг далдалари, бу касбнинг кишидан сабр-тоқат, бардош талаб қилиши ҳақидаги ўғитлари асқотди. Тушкунликка тушмай, изланаверди. Шундан бўлса керак, кўлга киритаётган барча ютуқларида устозининг ҳам хизматлари бисёр эканлиги ҳақида кўп гапирди.

У яқинда ўзи ясаган олти бурчакли, нақшинкор курсичаси билан вилоят кўригида иштирок этиб, фахрли биринчи ўринни эгаллашга муваффақ бўлди.

Суратда: — Изланишларимиз зое кетмади, — дейди мамнуният билан Санобар опа шогирди Ҳасанжоннинг севинчларига шерик бўлиб.

Р. АЛБЕКОВ туширган сурат.

Ўйин-викторина

(Давоми. Бошланиши 2-бетда).

"СВЕТАФОР-94"

2. Аҳмад трамвайда ўзини тўғри тута олмади.
3. Алишернинг ўртоғи тўғри гапирди. Ақром йўллардаги ҳаракатлиниш қондасини бузди.
4. Аҳмад транспортлар ҳаракати камқатнов бўлган, ҳаракат тартибга солинмайдиган чорраҳага дуч келган.
5. Бундай чорраҳадан ўтаётганда ниҳоятда эҳтиёт бўлиш керак. Чорраҳага кириб келаётган киши транспорт воситалари йўқлигига ишонч ҳосил қилингандан кейингина ўта бошлаши мумкин.
6. Аҳмаднинг ўртоғи "Хавфсизлик оролчаси"ни кўзда тутган. Йўлни кесиб ўтишга улгурмай қолган йўловчи "Хавфсизлик оролчаси"да тўхтаб туриши керак.

II БОСҚИЧ

САВОЛЛАР:

1. Кимларга ва қаерда велосипедда юришга рухсат этилади?
 2. Қайси ҳолларда велосипед ҳайдаш мумкин эмас?
 3. Саёҳатларга қандай транспорт воситаларида чиқиш хавфсиз?
 4. Нима учун йўлнинг ўртасида ёки йўл ёқасида турли ўйинлар уюштириш мумкин эмас?
 5. Йўл ҳаракати қондаларини бузаётган болаларни кўрганда қандай ҳаракат қилиш керак?
 6. Ака-ука йўлнинг икки томонида кетишаётган эди. Укаси акаси томонга чопиб ўтаман деб, бахтсиз ҳодисага учради. Аканинг хатоси нимада?
- ТОПШИРИҚЛАР:**
- Биринчи чорак якунига ҳам оз қолди. Таътил кунлари қуйидаги топшириқларни мактаб ва маҳаллаларда, турар жойларда амалга оширинг.
1. Сиз яшаётган ҳудудда, мактабингизда "Светофор" майдончаси бўлишига эришинг.
 2. "Йўл ҳаракати ёш назоратчилари" гуруҳлари ёрдамида йўл ҳаракати қондаларига оид турли ўйинлар, мавзуйи кеча, мушоира, мусобақа, китобхонлар конференцияси ва викториналар ўтказинг.
 3. Давлат автомобил назорати ходимлари, транспорт ҳайдовчилари, соғлиқни сақлаш ходимлари билан учрашувлар уюштиринг.
 4. Йўл ҳаракатига оид энг яхши расм, плакат ва макетлар танловини ўтказинг.
- Олиб борилган қизиқарли тadbирларингиз ҳақида ёзиб юборинг.
- "Светофор-94" ўйин-викторинасининг материалларини Фозилжон СОДИҚОВ тайёрлаган.

1-СИНФДАН 3-СИНФГА


Нигора ўта зеҳинли қиз. 15-мактаб 1-синфга қадам қўйган вақтларидаёқ ўзининг ўткир зеҳни, билимга чанқоқлиги, тиришқоқлиги билан тенгқурлари орасида ажралиб турарди. Утилган дасрларни тезда ўзлаштириб олиб, тушунмай қолган синфдошларига ҳам ёрдамлашиб юборарди. Қизчадаги ноёб қобилиятни пайқаган устози Шарифахон опа Акбарова у билан алоҳида шуғуллана бошлади. Тез орада Нигора нафақат 1-синф, балки 2-синф дастурини ҳам мукаммал ўзлаштириб олди.

Шу жиҳатларини эътиборга олган ҳолда Избоскан туман халқ таълими бўлимининг тезкор комиссияси Нигорани бир йўла 1-синфдан 3-синфга кўчиришди.

Отабек ҚОДИРЖОН ўғли, Андижон вилояти.

Қадри ўспиринлар!

Энди сизни "бола" деб бўлмайди. Фақат ўқиш ҳақидагина эмас, хунари ўрганиш, бир касбни эгаллаш борасида ҳам жиддий ўйлаш палласи етди. Бекорга элимиз орасида "Бир йигитга қирқ хунари кам" мақоли юрмайди-да. Ўзини эса хунари ўрганиш учун асосан моҳир устага шогирд тушишган. Бу ўзгача хунари мактабининг ўзига яраша шаклланган анъналари, амал қилса, фойдадан ҳоли бўлмайдиган удум ва рисоалари бўлган. Шубҳасиз, шу руҳда тарбияланган, забардаст уста бўлиб етишган усталаримиз хозир ҳам бор. Аммо



улар жуда кам. Негаки, кейинги 50 йилда уларнинг санъаткорона ишига эътибор берилмади. Бир хил қолипдаги нарсалар ясаш талаб қилингандан жуда кўп хунаридорларимиз синиб, уларнинг гўзал, зарур касблари кераксиз бўлиб қолди ва йўқолиб кетиш хавфи туғилди. Аммо бугунги кун тирикчилиги шубҳасиз ўша касбларни эгаллаш, турмушга жорий этишни талаб этмоқда. Бунда эса мустақил, еш давлатимиз сиздан умид қилади.

Яқинда мен хизмат сафари билан Бухорода бўлганимда Гиждувон туманидаги Улугбек мадрасасини таъмирлашда жонбозлик кўрсатаётган хунари эгаллашда, уш ешларга ўргатишда кўпчилик ҳурматини қозонган уста Азим ҚАЙИТОВ ишлари билан танишиб, суҳбатини олдим. Қарийб 50 йилдан буён тарихий обидаларни таъмирлаш билан шуғулланиб келаётган уста Азимнинг Бухорои шариф ва унинг атрофидаги жуда кўп асрий иморатларнинг мустаҳкам туришида алоҳида ҳиссаси бор. У доим фахримиз бўлган тарихий обидалар нураб бораётгандан, уларга эътибор ҳамон камлигидан, таъмирлаб боришга куч етмаслигидан куйнади. Бу ишларнинг яхшиланиши ешларимизнинг тарихимизга, хунари эгаллашга муносабати ўзгариши билан бўлади деб билади. Устанинг фикрига қўшилмай илож йўқ. Айниқса, унинг устоз-шогирдлик таомиллари, хунаридан қандай инсон бўлиши кераклиги ҳақидаги мулоҳазалари амал қилса аригуликдир.

— Уста бобо. Мажа сиз бутун умрингизни шу хунарига бағишлабсиз.

Айтингчи, меъмор учун энг муҳими нима, деб биласиз?

— Поклик ва ишқ. Меъморнинг, яъни иморат устасининг аввало кўнгли тоза бўлиши керак. Шундагина иши юришади. Унга ҳайратланарли салоҳиятни, куч-қудратни Оллоҳ ҳадя этади. Яна бири меъмор ўз касбини жуда ҳам севиши, ҳамиша ардоқлаши лозим. У ўз касбини қаида фарзандини яхши кўрганидек қадрламаса бўлмайди.

— Дарвоқе, Сизнинг хунарингиз оддий иморат устаси эмас, улуг бобоклонларимиз тиклаб кетган мухташам, мангуликка дахлдор тарихий обидаларнинг умрини узайтиришдир. Шу жиҳатдан таъмирчи билан янги уй қурувчи ишидаги фарқ нимадан иборат?

— Янги иморат устасининг иши ҳам осон эмас. Бироқ оралиқдаги меҳнат фарқини айтадиган бўлсак анча-мунча. Тарихий иморатни қайта созлайдиган уста

Хунаридор дур теради

шогирд ҳам шунга яраша устозини отасига тенг кўриши керак.

— Бу хунари сиз кимдан ўргангансиз?
— Бизнинг аجدодларимизда усталар кўп. Улар қаида 200 йилдан буён бир-биридан бу хунарни мерос олиб тирикчиликни юргизиб келишади. Шахсан меннинг бу хунарни эгаллашимда, айниқса, тоғам Имомқулнинг кўп меҳнати синган.

— Усталарнинг ўзига яраша амал қиладиган рисоласи бор дейишади?
— Унда энг таъқиқловчи даражада қайтарилган ишлар борми?

— Бор. Улар асосан учта.

— Ҳақиқий уста катта пул, катта мансаб, чиройли хотиндан сал нарида юрса иши юришади.

— Шогирдликдан мустақил усталикка ўтиш қандай бўлади?
— Бунинг ҳам ўзига яраша вақт-соати, удумлари бор. Шогирди қўлидан мустақил иш келишига ишонч ҳосил қилган уста

Зеҳинни пок айлангиз

замонавий қурувчилик амалларини билиши билан бирга аввало тарихий обида қурилган замондан, қолаверса меъморчилик тарихидан яхшигина хабардор бўлиши керак. У бу жиҳатдан чуқур билимга эга бўлсагина бу иморат дардини билувчи шифокордай ишга киришади. Акс ҳолда савоб иш қилганман, деб гуноҳга ботиб қолиши, қўллаган тadbир билан иморатнинг тезроқ нураб кетишига сабабчи бўлиши мумкин.

Тарихий обидаларни таъмирловчи яна бир ички талабга амал қилса ёмон бўлмайди. Таъмирлашда шоқалоқлик зарарли. Уста юрагига жуда бепоён сабрни жойлаб, эринмай ишлаши лозим. Шундагина бино гўзаллигига гўзаллик қўшилади, янада мустаҳкам бўлади.

— Бу касбни қай паллада ўрганган маъқул?

— 12-13 ёшдан ўтмаган ўспирин бўлса айни зеҳини, синчков чоғи бўлганидан усталикни эгаллаш тезроқ кечади. Бундай ешлардан кейинчалик иморатнинг миридан-сиригача яхши биладиган жуда моҳир, донгдор усталар етишиб чиқади.

— Қандай бола хунарни бекаму-кўст ўрганади?

— Хунаридан пулни юқори қўймагани. Пулга қизиққанлар хунарининг ярмини эгаллайди-ю, пул ишлашга ўтиб кетади. Холбуки, унинг хунари чала бўлиб қолади. Бунга бир ўрганилгач, кейин бу касбни бекаму-кўст ўрганиб, санъат даражасига етказиш гумон бўлиб қолади.

— Шогирд ва устозликдан энг улуг мезон нима?

— Уста шогирдини ўғлидай билиши,

унга алоҳида бир иш топширади-да шу-иш бошланиши оддидан махсус маросим ўтказилади.

Унда жамоат оддида ўтганлар арвоҳига хатми-қуръон қилиниб, шогирдга янги чопош кийгизилади, фўта (белбоғ) боғланади. Ва, унга оқ йўл берилиб "Ё ҳазрати Шоҳи мардон, Ё Ҳазрати Абу Бакр Сиддик" деб фотиҳа берилади. Жамоат оддига эса аввало ширгуруч тортилади.

— Нега палов эмас, ширгуруч?

— Бу рамзий маънога эга. Ширгуруч тайёрлашда сут қўшилишини биласиз. Шундан таом оқ бўлади. Жамоат оддига аввало бу таом тортилар экан, устанинг иши оқлик, эагулик дегани бўлади. Яна унда оқ йўл тилаш маъноси ҳам мужассамдир. Ривоят қилишларича, бу касбнинг пири ҳазрати Шоҳи Мардон ҳам илк шогирдлари оддига шу таомни тановул қилишга қўйган эканлар.

— Устозларингиздан яна нималарни ўргангансиз?

— Уста Шириннинг шогирдлари — меннинг устозларим бўлган Бобомурод Очилов, Аминжон Саломов, Анваржон Қуллиев кўпинча бировникида уста иш қилса, пул ва овқатни сўраб тортишмасин, аели бўлса ўзидан еши каттасини она е опаёсидай, кичигини сийғисин ва қизидай кўрсин, молига ҳам ола қарамасин дейишар ва бунга қатъий амал қилар эдилар. Оллоҳга шукурки, устозлардаги бу фазилятлар меннинг ҳам дилимга ўрнашган.

— Бунинг усталикка ҳавас қўйган ҳар бир ўспирин билиши ҳам фарз, ҳам қарадир.

Вафо ФАЙЗУЛЛО.

ТОПАҒОН

ЎЙЛАБ ТОП!

Қодирнинг кайфияти зўр эди. Чунки чўнтагида бироз пули бор ва у бу пулларга бирон нарса сотиб олишни мўлжаллар эди. Дўконга кириб, у дўкондордан чўнтагида қанча пули бўлса яна шунча қарз олди ва шундан сўнг бир сўм пул ишлатди. Кейин у бошқа дўконга кирди ва яна дўкондордан ўзида қанча пул бўлса шунча қарз олди. Ва шу пулдан икки сўм ишлатди. Шу таразда кетма-кет яна икки дўконга кириб, дўкондорлардан қарз олди ва аввалгидай 5,6 сўмни ишлатди. Қодир охири дўкондан чиқиб келганда унинг чўнтагида чақа ҳам қолмаган эди. Қани энди топингчи, Қодирнинг чўнтагида энг аввал қанча пул бор эди ва у жами қанча пул ишлатди?

ХОТИРА

Уруш-уруш ўйнаб болалар,
Кўлларида ёғочдан милтиқ.
Отадилар ёлғондан улар.
Бу ўйинга бунчалар интиқ.
Тол тагида сояда бир чол.
Кузатарди кўзларида ёш.
Хаёллари бебош хаёллар.
Ўксик қалбин тирнайди
бардош.
Мажруҳ чолда қолмаган
тоқат.
Орғиқ уруш гамин
тортмоққа.
Ярмисидан йўқ эди кўли,
Кўзидаги ёшли артмоқда.

ҚЎМСАШ

Болалик йилларим қ о л и б
кетдингиз,
Олис қишлоқларим ч а н г
кўчасида.
Мени минг бор олиб ўтдингиз,
Хайратга айланган ёз
кечасида.
Беғубор, хайратли яшаган
юрак,
Ошифта онларим к е л и н г и з
қайтиб.
Беғубор ёшликини ю р а г и м
қўмсаб,
Ўша кўчаларда юради дайдиб.
Қай бир тонг уйғониб
дард тўлғоғида,
Киприкда ёшларим қ о л а д и
қотиб.
Шу оқшом армонли
болалигимни,
Эссиз... бир умрга
қўйдим йўқотиб.
Сожида ЭШБҲУРИЕВА,
пайриқ.

ХАЛҚ АЙТАДИ

Кимнинг қандай инсонлигин
Баҳосини халқ айтади.
Синаб-синаб ахир бир кун
Вафосиздан эл қайтади.
Халқни алдаб нонин еган,
Имонига ўтлар кетар
Кейин келган янги авлод

Ундайларга лаънат айтар.
Мақсадимиз улуг халққа
Тоза виждонлилар керак
Биздан эзгу ишлар қолар,
Келажакка бўлиб ўрнар.
Ироданга олқиш айтар,
Бутун дунё, она халқим.

Обрўйингни омон сақла
Боболарнинг руҳи хаққи.
Жаҳон бизни танимоқда,
Раҳнамодир — юртбошимиз,
Келажакки буюк давлат,
Бахтли яшар авлодимиз.

Юсуф ЁҚУБОВ.

Донишмандлар бисотидан

Энг улуг фазилат

Қадим замонда бир мўътабар одамнинг икки ўғли бор эди. Бир кун уларни ўз ҳузурига чақириб олиб шундай деди:
— Ўғилларим, сизларни синамоқчиман, бир ой саёҳат қилинг. Шу бир ойлик умрингизни халққа фойдали, яхши ишларга сарф этинг. Қайси бирингизнинг қилган яхшилигингиз энг улуг фазилат касб этса, бирмоғимдаги мана шу қимматбахо узукни унга бераман.
Ўғиллари ҳар тарафга тарқалиб, саёҳатга чиқиб кетдилар. Бир ой саёҳат қилиб, яна отафарининг ҳузурига қайтиб келдилар. Ота катта ўғлидан сўради:
— Ўғлим, шу бир ой ичида қандай энг улуг фазилатли яхшилик қилдинг?
— Отажон, бир кун танҳо ўзим бир бог

кўчасидан ўтиб кетаётсам, бир ерда жуда ҳам қимматли олмос тушиб ётган экан. Уни олиб дарҳол тегишли маъмурларга топширдим. Маъмурлар бошлиғи менга ташаккур айтиб, қўлимга мана шу тақдирномани ёзиб берди. Олмоснинг эгасини топтириб унга топширди. Шу қилган ишим тўғрилигига бир далил, шу ҳаракатим энг улуг фазилат эмасми, — деб жавоб берди катта ўғил.
Отаси:
— Жуда тўғри иш қилгансан ўғлим, виждоний вазифангни адо этгансан. Лекин у олмос сенинг хусусий мулкнинг эмас-ку?
Кичик ўғли отасига таъзим қилиб:
— Отажон, менга доимо душманлик назари билан боқиб, зарар етказиб юрган бир одам бор.

Мен унга ҳеч бир ёмонлик қилмаган бўлсам ҳам, у пайимда юради, ҳатто мени ўлдириш учун фурсат кутади. Кеча у душманимнинг жуда паст бир жар ёқасида ухлаб ётганини кўрдим. Агар уйқусираб ёндан иккинчи ёнга ағдарилса ёки қаттиқроқ товуш чиқариб уйғотилса, туришга ҳаракат қилиб жарга қулаб тушиб шикастланиши мумкин эди. Мен товуш чиқармасдан, секингина юриб унинг ёнига бордим. Жуда эҳтиётлик билан уни ушлаб, аста-секин ўз томонимга торта бошладим. Анча берига келиб хавф-ҳатардан қутулгандан кейин руҳим кўтарилди, шодланиб йўлимда давом этдим.
Отаси ўғлининг бу гўзал ишидан, олижаноблигидан шодланиб кўзига ёш олди, уни кучоқлаб, юз-кўзидан ўпиб:
— Бор бўл, ўғлим, яша, умринг узок бўлсин, Мукофотимни олишга сен хақлисан, чунки дунёда энг улуг фазилат ёмонликка яхшилик қилишдир, — деб қимматли узугини ўғлининг бармоғига тақди, унинг хаққига дуо қилди.
Нашрга Хикматулло Х. тайёрлари.

Аждодлар ёди

Ҳожи Ҳалифанинг "Кашфу зунун"ида ёзилишига кўра, жаҳонгир Амир Темур даврида XIV аср охири ва XV аср бошлари кўпгина хунарпешагирлар, бунёдкорлик ҳамда бошқа жуда кўп санъат турларининг намоёндалари қатори Самарқандда яшаб илмий ишлар билан машғул бўлган Али ибн Муҳаммад Сайид ибн Шариф Журжоний ва Саъдийдин ат-Тафтазонийлар ҳам бўлиб, булар ўша даврнинг энг забардаст алаомалари ҳамда файласуфларидан эдилар. Хусусан, аллома замон деб таъриф-тавсифланган Саъдийдин ат-Тафтазоний дорулсалтанат Самарқанд мадрасаларида дин ва дунёвий илмлардан дарс берган, сарой олимларига сарбонлик ҳам қилган экан.

фикрли султон Салим Ҳофиз Тошкандийни илму амалда беҳад иқтидорли, салоҳиятли, фасих забон киши эканлигини кўриб, унга Туркияда қолишни ва вазири аъзамлик мансабини эгаллашни таклиф қилган. Бироқ олим ўзига билдирилган бундай улуг ҳурматлар учун бағоят мамнун ва миннатдорчилигини изҳор этиб, султоннинг таклифини узр ила рад этади ҳамда она замини Тошкентга қайтади ва қолган ҳаётини илмий ишларини давом эттиришга сарф

Ёрмуҳаммад ибн Пирмуҳаммад Мирхусайнийнинг "Муаммо" асаридир. Ҳофиз Тошкандий бу асарнинг бош қисмидаги очик саҳифасига ўз кўли билан форс тилида: "Таъжжуб ва хайратли иш. Бу қандай гавҳарки, мавлоно Соний махфий сирларни балогот ва латофат тариқи (тарзи) била маоний хазинасини фош қилубдирлар", деб ёзган жумлалар учрайди. Мавлоно Асомиддиннинг наҳвга оид "Мезон ул-адаб" ("Билим мезони") асарига

томонидан насталиқда ҳуснихат билан Балх шаҳрида араб тилида кўчирилган нусхаси, юқорида қайд этганимиздек, араб тилида ёзилган "Фавойиди Зейния" номли шарҳ асари, ўз устози мавлоно Асомиддин Иброҳим Исфаройийнинг "Шарҳ ул-мезон", "Дастур ал-фаройиз" номли форсий тилда ёзилган китоблари сақланмоқда.

ҲОФИЗ ТОШКАНДИЙ

Бу мўътабар зот 1393 йилда 81 ешида дорулсалтанат Самарқандда фоний дунёда дорулбақога рихлат этган. Марҳумнинг жасади унинг ўз васиятига биноан Сараҳсага элтирилиб, иззат-икром билан дафн этилганлиги ҳақида манбаларда қайд этилади. Ҳофиз Тошкандийнинг эса шахсан ана шу икки йирик алломалар, Али ибн Муҳаммад Сайид ибн Шариф Журжоний билан Саъдийдин ат-Тафтазонийларга бағишланган қимматли асари бўлган. Шунингдек, бу икки йирик сиймолар ўртасидаги адабиётшунослик термини ҳақида мунозараларнинг моҳиятини ёритиш мақсадида Ҳофиз Тошкандий "яна "Истиораи тамсила" китобини ҳам ёзган. Бу китобнинг бир нусхасини у Туркияга қилган сафарига усмонийлар ҳукмдори султон Салимга ҳадя қилган. Аллома Ўстамбулда бўлган кезларининг дастлабки кунларида улуг фалакшунос бобоси Али Қушчи дафн этилган муқаддас зиёратгоҳ "Або Аюб Ансорий" қабристонига борган ва Аловиддин Али Қушчининг қабрини зиёрат қилган экан. У салжуқийлар ҳукмдори ва унинг вазири аъзами Муҳаммад пошшонинг беҳад ҳурматларига сазовор бўлган. Узокни кўра билувчи, ўткир (Давоми. Бошланганини ўтган сонда).

қилади.
Ҳофиз Куйкий Тошкандийнинг яна бир машҳур "Тарихи олий Чингиз" ("Чингизхон ва унинг авлодлари тарихи") асари мўғул ва ўзбек халқлари тарихига оид асардир. Бу асар манбаларнинг нечоғлик аниқ ва тўлаллиги билан ўтмиш тарихчилар асарларидан шубҳасиз бевосита ажралиб туради. Ушбу нодир китобни езишда у умрининг кўп қисмини мўғул ҳукмдорлари саройида ўтказган эронлик номдор муаррих Баҳониддин Муҳаммад Хожа Аловиддин Отамалик ал-Жувайнийнинг (XIII аср) "Тарихи жоҳонкушойи ал-Жувайний" ("Ал-Жувайнийнинг жаҳонни фатҳ этган жаҳонгир ҳақидаги тарихи") номли форс тилида ёзилган асаридан, шунингдек яна бир машҳур муаррих ҳамда табиб Рашидиддиннинг (1247—1318 йил) ҳам шундай форс тилида ёзилган "Жомеъ ат-таворих" ("Танланган тарих") асаридан кенг фойдаланган.

"Ужолат ул-баен фи шарҳ ал-мезон" ("Мезон шарҳининг тезкор баёни") деб номланган шарҳи каби қатор асарларнинг муаллифи ҳамдир.

Ҳофиз Тошкандий илмга бўлган муносабатини ҳар нарсдан юқори қўяди. У илм дўстлиқка, адолатпарварлик, гўзал ахлоқлик, Тақвогарлик, раҳм-шафқат, маънавий неъмат, олийжаноблик ҳамда меҳр-муҳаббатга ундовчи қиёссиз ёрқин нур эканлигига асарларида ишора этади.
Кўриб ўтганимиздек, замонасининг буюк маърифатпарвари, тадқиқотчи сайеҳи бўлган бу улуг инсон, ажойиб сўз устаси кейинги изланишларга биноан, "Сижил Усмоний"да ёзилганидек, 1572 йили эмас, балки 1584 йили 94 ешида Тошкентда рихлат этган экан. Баъзи маълумотларга қараганда, унинг жасади ҳазрати Имомдаги Кафпол аш-Шоший мақбарасига кираверишга яқин ўнг тарафга дафн этилган экан.

Ўзбекистон Фанлар академияси Абу Райҳон Беруний номидаги Шарҳшунослик институти Ҳофиз Тошкандийнинг "Шарҳи одобул ал-мунозара" ("Одоб-ахлоқ тўғрисида мунозара китобида шарҳ") китобининг 1604 йилда Муҳаммад Замон бинни Лутфулло хаттот

Мазкур асарларни синчиклаб ўрганиш ва аҳоли қўлида сақланиб қолган қўлёзма китобларни қидириб топиш тошкентлик бу йирик, забардаст аллома ҳамда моҳир сиёсий арбобнинг ҳаёти ва фаолиятига доир янада тўлиқроқ маълумот бериш имконини яратади. Бинобарин, ўлкамиз илму фани тарихига бешак шубҳасиз янада янги мазмундор саҳифалар кўшилади.

Аммо ҳозирда, Мирзо Улуғбекнинг фалакиёт соҳасидаги энг яқин маслақдоши бўлган захматқаш улуг аллома Аловиддин Али Қушчининг Тошкентда яшаган ардоқли номдор набирасининг номини абадийлаштиришга қаратилган тадбирлар ҳанузга қадар кўрилмапти. У яшаган ва қадимдан унинг табаррук номи билан юритилиб келинган маҳалла бугунги кунларда нечундир ёд этилмайди. Юқорида қайд этиб ўтганимиздек, бошқа ном билан аталиб келинаётганиги кишини гоёт ажаблантиради, албатта. Ваҳоланки, авлодларнинг илм чашмаларидан баҳраманд бўлишлари учун нечоғлик тер тўкиб игна билан қудук қазигандай заҳмат қилган буюк аждодларимизни асло унутмаслигимиз, уларнинг руҳи-покларини мангу хотирлаб туриш биз ва келажак авлодлар олдидаги бирдан-бир кечиктириб бўлмайдиган масала бўлиб колмоғи керак! Мана шу ҳақда ҳам бир ўйлаб кўрилса ва аллома Ҳофиз Тошкандийнинг азиз номи аввалдай ўз жойида қарор топса, ёмон бўлмасди. Зеро, биз эзгу мақсадларнинг ҳамиша амалга ошишига сўзсиз комил-ишонч билдирамиз!

Ҳабибулла ЗАЙНИДДИН.

Бош муҳаррир вазифасини бажарувчи: Музаффар ПИРМАТОВ

Таъсис этилувчилар:
ЎЗБЕКИСТОН ЕШЛАР ИТТИФОҚИ МАРКАЗИЙ
ҚЎМИТАСИ, ЎЗБЕКИСТОН РЕСПУБЛИКАСИ ХАЛҚ
ТАЪЛИМИ ВАЗИРЛИГИ
Газета 1929 йил, 1 августдан "Ленин учкуни"
номи билан чиқа бошлаган

Маълумот учун телефон: 33-44-25

Т. Ю

Таҳрир хайъати:
Сафар БАРНОЕВ, Феруза ЖАЛИЛОВА,
Сойибжон ИСМОИЛОВ, Дилдора
ТУРАХМЕТОВА, Сабоҳат ШУКУРОВА.

Бизнинг манзилгоҳ:
700083. ТОШКЕНТ ШАҲРИ,
МАТБУОТЧИЛАР КЎЧАСИ, 32-уй.
Нашр кўрсаткичи: 64563

Газета ҳафтанинг сешанба куни чиқади

"ШАРҚ" нашриёт-матбаа концерни босмаҳонаси.

Газета IBM компьютерида терилди ва саҳифаланди. Корхона манзили: "Буюк Турон" кўчаси, 41-уй.

Рўйхатдан ўтиш тартиби № 000137. Буюртма № Г—1002. 14834 нусхада босилди. Ҳажми — 1 босма табоқ. Офсет усулида босилган. Қоғоз бичими А—3.

Босишга топшириш вақти 19.00. Босишга топширилди 19.00.

1 2 3 4 5 6